

ELIZA ETA BAKEA. Lau elizbarrutiek euskal gizarteari «itxaropena txertatu» beharra nabarmendu dute



JOSEBA OLALDE

Hego Euskal Herriko lau apezpikuek aurkeztu zuten bakearen aldeko ekitaldia.

ATENTATUA

«Lotsagarria eta negargarria da»

Bezperan Terrassan PPko zi-negotziaren aurka izandako atentatua gaitzetsi zuten Hego Euskal Herriko gotzainek. ETari «herriaren oihua» entzuteko eta hari jaramon egiteko eskatu zioten, zinegotziaren senideei eta lagunei elkartasuna eta doluminak emateaz gain.

Hilketak bakearen alde mobilizatzeko «beste arrazoi bat» eman duela adierazi zuen Juan Maria Uriartek, eta atentatua «lotsagarritzat» jo zuen. «Gaitzesten dugu ETak egin duen azken atentatua. Lotsagarria eta negargarria ere bada. Izan ere, familia bat desegin dute, eta herriaren bake itxaropna zapuztu. Gainera, demokraziari eraso diote», adierazi zuen.

Gainera, herriak «bide demokratikoak» eskatzen dituela jakinarazi zioten ETari lau gotzainek.

Bakearen alde ekimena antolatu dute Hego Euskal Herriko lau gotzainek

Batera egingo duten lehen mobilizazioa da, eta «ideologia guztiak» bildu nahi dituzte

Felix Iriarte | GASTEIZ

Mobilizazio erraldoi bat egingo du Elizak bakearen alde. Hala iragarri zuten atzo Hego Euskal Herriko lau apezpikuek, Ricardo Blazquezek (Bilbo), Carmelo Etxenagusiak (Bilboko gotzain laguntzailea), Juan Maria Uriartek (Donostia) eta Miguel Asurmendik (Gasteiz); eta dei egin zieten herritarrei eta eragile sozialei mobilizazioarekin bat egiteko.

ETak su-etena hautsi ondoren gizartean zegoen bake itxaropena galdu egin dela esan zuten gotzainek, eta, hori ikusirik,

gizarteak «zerbait» egitea eskatzen duela. Elizak berea jarri nahi du irtenbidea bilatzeko, eta otoitz egiteak mesede egingo duelakoan, mobilizazioa iragarri du. Gasteiztik gertu, Armentiko baselizan bilduko dira, Mendizabalaraino erromes joan eta ekitaldia egiteko.

«Elizak egin dezakeen ekarpenik garrantzitsuena da bitaminak txertatzea itxaropen horretan. Bakearen aldeko oihua izango da», esan zuen Juan Maria Uriartek, ekitaldiaren beharra adierazteko.

Ekitaldi jendetsua izatea espero dute gotzainek. Izan ere,

DATUAK

Milaka lagun zain

Noiz eta non. Datorren urtarrilaren 13an izango da. Goizeko 11:30ean da hitzordua, Armentiko baselizaren aurrean. Handik Mendizabalaraino joango dira erromes, ia kilometro eta erdi, ekitaldia egiteko.

Leloa. *Guztion artean, bakea guztion alde.* Bakearekin lotutako mobilizazioetan Elizak erabili ohi duen leloa hartu dute.

Aurrekariak. Lau elizbarrutiak batera egingo duten lehena izango da. Lehenago Arantzazun, Urkiolan eta Armentian eginak dituzte.

lau elizbarrutiek batera egingo duten lehen mobilizazioa izango da, «berezia», Elizako arduradunen esanetan.

Jendetsua izateaz gain, Armentian «kolore eta ideologia guztietako» herritarrak biltzea espero dute. Gotzainek eragile sozialei dei berezia egin zieten mobilizazioan parte har dezaten, baina batez ere alderdiei eta mugimendu sozialei. Baita ere kristauak ez direnei, bakearen helburua guztiaren gainetik dagoelakoan.

«Ez da gure kontzientziak lasaitzeko izango»

Indarkeriaren amaiera ez da etorriko, apezpikuek adierazi zuten, alde bakarreko jardunarekin. Guztiek, alde askotatik, eskuan dutena jarri behar

dute egoera konponbidean jartzeko. «Biolentziaren amaiera eta gatazkaren konpontzea ekitaldi konbergente askoren emaitza izango da. Gizarteari dagokio hala egitea, baina batez ere ongizatea bermatzeko dauden erakunde politikoei eta pertsonaei», ohartarazi zuen Miguel Asurmendik.

Jainkoak ere berea jarriko duela ziur dira gotzainak. «Ziur gaude bakea ez dela etorriko, Jainkoaren laguntzarik ez bada», esan zuen Arabako gotzainak. Hori dela eta, otoitz egitea gomendatu zien kristau guztiei, baina ez «porrota» onartzeko edo «kontzientziak lasaitzeko». «Jainkoa bake Jainkoa da, eta bakea nahi du bere herriarentzat», adierazi zuen.

LEGE ALDAKETA. Senatuak onartuta, ez du berriro Kongresutik pasa beharko

Azken tramitea igarota, lege aldaketak laster jarriko dituzte indarrean

Agentziak | MADRIL

Espainiako Gobernuak proposatutako eta bultzatutako lege aldaketek dagoeneko pasa dute azken tramitea, eta laster sartuko dira indarrean. Izan ere, herenegun gauen Espainiako Senatuak osoko bilkurak ia aho

batez eta aldaketa bakar bat ere egin gabe onartu zituen Adin Txikikoen Legearen eta Kode Penalaren aldaketak, eta aldaketan lege proiektuak ez du berriro ere Espainiako Kongresutik pasa beharko. Lege proiektuak 201 senadorearen aldeko botoak lortu zituen, eta 10 sena-

dorenen botoak izan zituen kontra —IUrenak eta EAJrenak—.

Espainiako Justizia Ministerioak atzo adierazi zuenez, urtea amaitu aurretik indarrean sartzea espero dute, baina hori ez dago Gobernuaren esku, Estatuko Buletin Ofizialean argitaratu behar baita lehenago. Gogoratu behar da Adin Txikikoen Legea urtarrilaren 12an sartuko dela indarrean; beraz, aldaketak derrigorrez lehenago sartuko dira.

'OTANO KASUA'. HBren eskaera bete du epaileak

Iruñeko Entzutegiak Esparza, Urralburu eta Aragonen Suitzako kontuak bahitu ditu

Irene Arrizurieta | IRUÑEA

Iruñeko Entzutegi Probintzian Otano auzia daraman epaileak Suitzan Gabriel Urralburu, Antonio Aragon eta Jorge Esparzak dituzten ondasunak bahitzeko agindu du. Ondasunak bahitzeko, HB akusa-

zio partikularrak eskatu zuen. Paul Perraudin epaile suitzarrak zigorrak ezarri dizkie hirurei eta Roldani, dirua zuritzeagatik. Akusazioak «ezinbestekotzat» jo zuen neurria eta eskaera onartzea auzirako «oso ona» dela dio. Orain Perraudini eskatu epaiaren zain dago HB.